

金

石

錄

補

金石錄補卷十五

跋尾

崑山葉奕苞九來著

唐崇仁寺尊勝陀羅尼幢

唐封恒山碑

唐章仇府君碑

唐靈運禪師塗碑

唐永泰寺碑

唐施燈功德碑

唐心經

唐張萬頃恒嶽題名

唐旌儒廟碑

唐杜甫授左拾遺誥

唐憫忠寺寶塔頌

唐通微道訣碑

唐祈雨疏

唐王宥等華嶽題名

唐心經石幢

唐郭敬之廟碑陰

唐李寶臣碑

唐承天軍城記

唐鐵元始讚

唐孔子廟殘碑

唐石敢當碑

唐崇仁寺尊勝陀羅尼幢

右碑小而方額作八佛豫題云佛頂尊勝陀羅尼神呪
天寶七載五月建集賢院待制張少悌行書後列燈臺
主中散大夫守內侍上柱國賜紫金魚袋太原縣開國
男王尙客及姚承慶李孝忠楊敬順張如意四人皆兼
議郎朝散將軍其後則直言果毅駕士扶車王待慶等
六十人李唐晚季制于家奴天寶開元已兆之矣

唐封恒山碑

右碑題云大唐博陵郡北嶽恒山封安天王之銘左羽
林軍兵曹參軍直翰林院學士供奉上柱國李荃撰吳

郡戴千齡八分書天寶七載五月廿五日建序云開元
天寶聖文神武應道皇帝登太山躡社首于上元庚寅
先封東西二嶽其三岳典禮猶關北嶽封爲安天王後
列范陽節度安祿山博陵太守賈循及從吏馮丞相張
元瓚鄭攸郗懷玉等職銜皆有頌揚之語而于安賈則
云常樂安公曰祿山國之英也八柱承天三門出將武
威賈公曰循時之傑也夫以國英時傑出于自稱李荳
阿諛必小人之尤況傳稱祿山陽爲愚不敏其姦工于
媚上以天寶七載正月羣臣上尊號而祿山卽樹碑恒
岳僭封爵爲辭而致其上號之意且夸揚已烈有風順
遼海霜明憲秋等語不臣之漸於此可見後附杜甫金

韓休烈刻字與碑陰同按天寶五載正月封北岳安天
王寶應二年五月改封寧天王

唐章仇府君碑

右碑題云大唐贈東平郡太守章仇府君下學士知史
官事韋口撰翰林院學士內供奉左衛率
闕蔡有隣書
天寶七載十月二十日立府君諱元素字立素兼瓊之
父也兼瓊著績西蜀兩書無傳其祖父名字非此碑幾
不聞于後蔡八分書在韓擇木張庭珪之上而此碑巋
然標樹于大道之旁西去濟寧州三十里車塵馬矢堆
積其下更無有拂拭之者子命工人揭之從游者無不
笑其癡而不知世之不癡者視子所得爲多焉否也

金石錄卷十一
唐靈運禪師塔碑

右碑題云唐少林寺靈運禪師塔碑宣德郎試大理評事崔琪撰聖善寺沙門勤潤行書天寶九載四月十五日門人堅順建按碑禪師俗蕭氏蘭陵人武帝之後也碑在少林寺中

唐永泰寺碑

右永泰寺碑題云大唐中嶽永泰寺碑靈昌郡龍興寺沙門靖彰撰潁川處士荀望書天寶十一年壬辰閏三月五日建按魏正光二載孝明帝妹入道爲尼勅置明練之寺度尼廿一人唐貞觀二載議以尼寺居山恐非人侵擾移置于偃師縣神龍二載嵩嶽寺僧道瑩奏請

爲故永泰公主寘寺一所卽以此寺名爲永泰許之按
公主爲中宗第六女不嫁武延基忤張易之爲武后所
殺帝追贈改葬極其哀憫故道瑩奏中有二后深玉碎
之悲凡屬含情莫不悽惻云云且唐制僧尼一七二七
三七而止今吳下叢林累百及千去古制遠矣

唐施燈功德碑

右碑題首歎二字下云施燈功德經空五字又云齋世
耶舍譯後云天寶十三載正月十五日左驍衛漁陽府
折衝下姜如珍等同建按經文義勸人施燈于塔院者
有全照一階道二階三階四階或及塔身一級二級以
至多級一面二面乃至四面等語且有不空羈索經云

云字晝近褚河南碑在香積寺中

唐心經

右心經後云天寶十五年二月一日朝議大夫行尙書武部郎中上柱國徐浩書浩父嶠之善書至浩而益工此經莊嚴中不乏風致所謂怒猊抉石渴驥奔泉者消融始盡華亭董尙書云太宗柏谷塢告文開李北海徐會稽之漸信然也

唐張萬頃悟嶽題名

右題名八分書殘泐已甚存博陵郡諸軍事守關軍使張萬頃奉關四載十月十六日按唐天寶于四季始稱載十五載止至至德復稱載舊二季此非四載卽十四

載也故附于天寶諸碑中

唐旌儒廟碑

右碑賈至撰廟在臨潼縣西南二十里驪山半原橫阤
村舊名阤儒鄉引漢書注顏師古曰新豐縣溫湯之處
號愍儒鄉西南三里有馬谷谷之西岸有阤相傳爲秦
阤儒處衛宏詔定古文官書序云秦旣焚書患苦天下
不從所改更之法將諸生到者拜爲郎七百人乃密令
冬種瓜于驪山阤谷中溫處爪實成詔博士諸生說之
人人不同乃命就視之爲伏機諸生方相難決發機從
上填之此則愍儒之地也唐天寶中改爲旌儒鄉立旌
儒廟按史記始皇三十五年因盧生僕生亡去遂疑諸

生在咸陽者爲訛言以亂黔首于是使御史悉案問諸
生諸生轉相告引乃自除犯禁者四百六十餘人皆阤
之自除云者猶自首免罪也則所阤者在四百六十餘
人之外並無數目未知衛宏所云種瓜冬實七百餘人
決難等有何據也碑在廟前

唐授杜甫左拾遺誥

右勅襄陽杜甫爾之才德朕深知之今特命爲宣義郎
行在左拾遺授職之後宜勤是職毋怠命中書侍郎張
鎬齋符告諭至德二載五月十六日行蓋用黃麻紙高
廣皆可四尺字大二寸許年月有御寶寶方五寸許今
藏湖廣岳州府平江縣裔孫杜富家見錢謙益杜詩注

而予所見石刻則宋紹興中也按少陵季譜至德二載在賊中五月竄歸鳳翔拜左拾遺上疏救房琯上怒詔三司推問張鎬救之仍放就列與此勅年月同

唐憫忠寺寶塔頌

右憫忠寺碑題云范陽郡憫忠寺御史大夫史思明奉爲大唐光天大聖文武孝感皇帝敬无垢淨光寶塔頌范陽府功曹叅軍蘇靈芝書至德二載十一月十五日建憫忠寺者在今京師昔唐太宗征高麗回念忠臣義士歿于王事建此寺以薦之按史至德元載十一月思明寇太原二載十二月乙丑思明降此碑建于十一月則思明將降悔過之舉也但上皇天帝御宣政殿授肅

卷之三
宗傳國受命符冊號曰光天文武大聖孝感皇帝在乾
元元年之正月建碑時尚隔三月不應預書尊號且本
紀大聖二字在光天文武之下二年正月復上尊號曰
乾元大聖又在光天文武上碑以光天文武四字分開
何也又按思明旣爲歸義郡王復殺烏承恩父子而反
使耿仁智張不矜上疏請斬李光弼疏入函仁智獨易
去思明捶殺之則不矜者固甘爲逆者也以其文詞斐
然靈芝書名籍甚存之

唐通微道訣碑

右通微道訣七十五句前云御製後云大唐乾元元年
六月十五日于大同殿奉誥賜無書人姓名按訣爲明

皇製碑爲肅宗敕道士達觀大師楊重衡于渭北大化
觀立石歲久字泐知觀楊思聰補上此石訣云善本破
惡不合邀名施本濟人不合求報又云以心爲舟以信
爲車車用在于運舟用在于虛常取不足勿求有餘又
云爾當慎汝身洗汝心內養五神外合一氣去萬惡增
萬善真經之旨不死之方盡于是爾其易哉此皆五千
言之糟粕演而成訣耳王者寡欲清心納身軌物自然
清明在躬志氣如神安用孜孜于真經之旨不死之方
也哉

唐祈雨疏

右碑篆書前金州刺史李權書也碑云大曆中興克復

雨京後乾元元季自十月不雨至明季春朝散大夫使持節華州諸軍事檢校華州刺史平原郡開國公賜紫金魚袋張惟一與華陰令劉嵩涇丞員外置同正員李緩主簿鄭鎮尉王崇尉高珮尉崔季陽于西嶽金天王祠祈請云云按華陰一縣子令之外設二丞一簿三尉有唐官制之濫史所備載語云一羊九牧民生日蹙天寶之亂所由來也在述聖碑之左旁

唐王宥等華嶽題名

右華嶽題名上元元季三月華陰令王宥前令王紓丞王沐尉李齊權領鄭縣簿張彬尉竇或下邽丞李演尉邢步處士王季友張彪著作郎孟昌原法曹叅軍李樞

同謁年月上方用小篆姓名下方用八分皆李樞書不作俗筆今與顏魯公題名並存云

唐心經石幢

右石幢廣德二季少府裴監施造朝請郎趙偃書般若心經一部在今順天府吉祥庵中萬歷丙午西吳僧真程葺庵發古甃下得此幢式如燈臺改名石幢庵云

唐郭敬之廟碑陰

右郭敬之廟碑陰記汾陽兄曰秀弟曰子雲子瑛子珪幼賢幼儒幼明幼冲皆列顯位而本傳獨載幼明一人且汾陽初授左衛長上改官封拜至尚書令兼中書令凡二十四考序次歷歷本傳初授左衛長史而非長上

或云累遷或云又兼多畧而不錄碑記實封二次止四百戶本傳則七百戶碑云拜尙書令在廣德二年十一月而傳云辭尙書令在十二月宜以碑爲信是年汾陽年六十八尙未攝冢宰尊尙父故碑缺焉碑銘爲顏平原撰碑陰行書趙氏失錄故收之并記其與本傳異者如左

唐李寶臣碑

右碑題云成德軍節度使開府儀同三司檢校尙書右僕射兼御史大夫恒州刺史充管內支度營田使清河郡王李公紀功載政碑頌李公者寶臣也予讀其傳每嘆屬奚附逆反覆不常朝廷輒以僞署爲眞賜姓名授

鐵券唐之不振至于如此然竊計當時強藩互結不如
此不足以慰來投之心招未歸之賊按碑建于永泰二
年七月追頒其功則曰壬寅歲寶應皇帝嗣位冬十一
月我亞相張公忠志率東諸侯復命兩唐書無月日而
代宗紀與碑合九節度之圍相州也寶臣懼而來歸封
密雲郡公爲舊書所遺新書云擢寶臣爲禮部尚書封
趙國公又與碑異碑云授禮部尚書兼御史大夫成德
軍節度使封清河郡王賜姓改名此恒州耆老賈審祥
等頌之之碑立于當時必無疑誤何兩書俱不之及而
未載隴西郡王豈寶臣王封有二次耶抑兩書誤以清
河爲隴西耶如寶臣以五州來獻開東門納王師而止

封趙公則加于密雲無幾豈足以酬其志似當以碑爲
正碑在今真定府公署中巋然巨碣也豈劉宋二公未
之見耶

唐承天軍城記

右碑題云承天軍記道士胡伯成撰大歷元年閏月建
名山記平定州鵲山上有扁鵲廟其峯高峻唐置承天
軍城碑云開府張公至鵲鵲洪中頂四顧在日遂冠小
城于峯巔云云朱錫鬯云城踞險隘有一夫當關千夫
莫過之勢巉崖峭壁多唐宋人題名

唐鐵元始讚

右碑題云鐵元始讚并序潛邱道士胡伯成譏河東節

度旣築承天軍城復鑄鐵元都聖容天尊仙衛故伯成爲讚在大歷元季記城成時作也

唐孔子廟殘碑

右碑程浩撰顏真卿書大歷二年立顧寧人曰此文駕部郎中程浩爲扶風縣文宣王廟記載于唐文粹而今西安府學有僧夢英書與此記文正同但去扶風古縣也以下半篇其跋云此記刻石原在湖州臨安縣夢英愛而書之豈駕部作此于扶風魯公又書之于湖州而去其以下之文耶考唐地里志臨安屬杭州不屬湖州得非夢英之誤耶今華州有殘碑數十字其文同

唐石敢當碑

右碑云石敢當鎮百鬼壓災殃官吏福百姓康風敦盛
禮樂張唐大歷五年閩縣令鄭押記王象之云碑在莆
田按今人家用石刻此石敢當三字鎮于門首不謂當時已有之矣信乎物必有所自也然此在南方爲多

金石錄補卷十五

金石錄補卷十六

跋尾

崑山葉奕苞九來著

唐臧希晏碑

唐上元縣福興寺碑

唐永仙觀碑

唐公孫杲贈道士詩

唐泰山造碑樓記

唐孟皞等恒嶽題名

唐華山禪院洪鐘記

唐臧希晏碑

右碑銀青光祿大夫行兵部侍郎上柱國清河郡開國

公張孚撰孚字殘沕嘉興曹侍郎溶所藏本隱隱可識乃搨工之優也朝議郎守衛尉少卿淮陽縣開國男賜紺魚袋韓秀弼書希晏爲懷恪子字恭靖以太僕卿兼寧州刺史拜金吾衛將軍廣德二年卒大歷五季葬碑中止列弟希讓而佚其兄希崇希旭希忱希愔希景蓋懷恪七子皆貴顯趙氏云臧氏世墓在三原有數碑盡得之此碑應在得中而遺之何也豈以其隸書與文庸下爲不足存也邪

唐上元縣福興寺碑

右碑題云大唐上元縣福興寺碑尚書金部郎中兼侍御史許潤撰大理評事張從申書并題額後云大唐潤

歲次庚戌六月二日述按寺爲梁大同二年造有禪
師道融于上元辛丑移舊額肇新居云云自辛丑推至
庚戌爲大歷五年也從申行書酷似北海麓山寺碑但
北海善變化耳此碑雖漫漶其神理風格奕然動人歐
公云初得從申書王師乾碑不以爲佳及問秦玢知李
西臺亦學從申又云從申書絕不行于世止得吳季子
崔圓并師乾三碑耳而予復得此碑不亦快乎

唐永仙觀碑

右碑丹州別駕蕭森字從政撰集王右軍行書觀在唐
京兆府美原縣卽今之富平縣觀主田名德同令柳升
奉天寶二年詔書葺治永寧鄉古廟至大歷六年三月

落成建碑也自明皇夢見老子真容之後承奉風旨者
獻符瑞興土木于戈肆起幾至亡國恬不知悔田名德
爲中宗時景龍觀所度道士年八十餘刻清淨智慧觀
身經亦集右軍書裏五千言之精粕殊不足觀與此碑
並傳于世

唐公孫果贈道士詩

右五言律詩一首題云贈諸法師乃行博城縣丞公孫
果所作在大歷七季正月廿三日修齋醸記之後詩平
平書特秀勁有法其上眉有徂徠山人高季良岱嶽山
人王禹等題名書更超逸得北海會稽神髓尤爲可愛

唐泰山造碑樓記

右記大歷八季九月內府丞劉元信等奉勅于東嶽脩
金篆行道七日夜告高宗元宗紀號并造碑樓六所而
附刻于岱嶽觀碑中也唐之封禪於岱宗爲最穹碑巨
碣森峙琳宮故造碑樓至于六所今摩崖紀銘而外惟
此碑尙存然歐趙兩錄俱未之及卽子奕正金石志亦
在所遺非子搜訪之勤將與寒烟衰艸共滅沒而已天
下之如是碑者可勝計哉

唐勅祭使孟皞等恒岳題名

右題名五人而泐其一孟皞以散騎常侍平昌縣開國
子奉勅主祭王士則以知州事亞獻王巨源以太僕少
卿爲勾管祠祭官盧基以監察御史奉勅爲監察使後

金石錄補卷十六

題云大歷九季二月六日王士則書于諸題名中行書
矯健不羣翩翩獨秀爲可觀也

唐華山禪院洪鐘記

右記將仕郎試秘書省校書郎李翹撰沙門懷用集晉
王羲之書大歷十一季乙卯歲之六月望日記予竊疑
之翹集有泗州開元寺鐘銘甚古雅此記拖沓絕不類
一也翹傳貞元十四季進士授校書郎未聞于二十年
前已爲此官二也通鑑及紀年諸書大歷十年歲在乙
卯此碑爲十一年三也趙氏凡夫藏此碑後歸家石君
云

金石錄補卷十六

金石錄補卷十七

跋尾

崑山葉奕苞九來著

唐高力士碑

唐平蠻頌

唐姑神頌

唐段行琛碑

唐景教流行中國碑

唐吉遡題雲居寺詩

唐顏真卿送劉太沖序

唐顏真卿遺子帖

唐顏真卿奉使題字

唐誌公畫像贊

唐吳嶽祠堂記

唐咸宜公主碑

唐顏真卿移蔡帖

唐景昭大法師碑

唐幽州新置文宣王廟碑

唐賀蘭夫人墓誌

唐高力士碑

右碑止半截題云唐故開府儀同三司內寺監御駕部員外郎知制誥韓惲大歷十二年五月奉敕建姓名雖殘闕然碑中有焉之先自北而南者宋懷化侯以至于

益知爲高力士碑傳云力士潘州人馮益之曾孫也碑
云智幾爲高州刺史智載爲恩州刺史 賀全爲潘州
刺史卽家潘州則力士爲潘州之子後贈潘州廣西大
都督傳云李千里以二闡兒上進曰金剛曰力士武后
以其彊悟給事左右碑云公以名賢之後遭亂來歸則
天矜其覆巢知必成器選內官而母之卽傳所謂高延
福收爲假子也力士幼與母麥氏相失嶺南節度使得
之迎還碑亦載及以內侍監歷官至冠軍鎮軍輔國驃
騎大將軍比傳爲詳嗣子正議大夫前將從少監渤海
郡開國侯承悅禮謂猶子等語傳之所遺力士在宦者
之中處決大事悉當上意配流黔中會赦歸聞上皇厭

代北望號慟嘔血而卒代宗以其耆宿保獲先朝特贈揚州大都督陪葬泰陵豐碑屹狀至今猶在長安不知趙氏何以遺之也

唐平蠻頌

右碑韓重卿撰韓秀實八分書李陽冰篆額大歷十二年月建按西原諸蠻自肅宗正德以後百餘年互相結約乍服乍叛攻桂管十八州所至殘破元道州所謂城池井邑但生荒草登高極望不見人烟者此也碑云大歷十一年賊帥潘長安自稱南安王誘脅諸蠻連跨州邑流毒彌甚隴西縣男昌巒持節招討手擒賊帥并將卒八十四人生獻闕下俘獲二十餘萬盡給牛種令

還故籍云云勳烈可謂雄矣而史無傳歐趙集古亦未之及鄉非此碑其名湮沒久矣惜哉

唐妬神頌

右碑題云妬神頌并序判官游擊將軍守左清道率府
率賜紫金魚袋上柱國李禋撰行書姓名殘缺大歷十
三年五月十六日建按序神爲介之推妹以其兄死焚
火乃于冬至之後日積一薪烈火焚之其言曰兄則焚
火以示誠吾則焚柴以見志歿而爲患于一方鄉人立
祠祈賽輒應天寶中遭祿山之亂遺廟歸狀故山南東
道節度經畧副使黨公昇修廟祈秋乃爲此頌云云夫
古之以死勤事以勞定國有功德于民者則祀之貞女

義婦載在祀典未聞女以妬名而廟食者當在淫祠之列黨公不爲之去而頌之何也祠在河干相傳武后幸此懼欲別開道避之狄仁傑曰一人行幸雨師灑道風伯清塵何妬女之避哉遂止其役則唐之習俗蓋已久矣冊府元龜龍星木之精也春見東方心爲火火盛故爲之禁火俗傳介之推以此日被焚而禁也今之所謂寒食一百五日者熟食斷烟謂之龍忌本此子觀左傳史記竝無子推被焚之事以琴操所記子推之死乃五月五非三月三日也況清明寒食初無定日必指爲上己矣矣碑陰自同經略副使王曇而下二十一人其官將太常卿及節度隨身官之名其姓有僻閭珣之異

唐段行琛碑

右段行琛碑張增書李同系篆額無撰文姓名大歷十四年閏五月建按碑行琛爲忠烈公秀實父行琛四子長祥穎次秀實次秀成次同穎史多逸之琛爲汧陽人碑在汧陽按趙氏錄行琛碑爲楊炎撰蕭正書當是段公有二碑也增無書名而道逸豐滿如此

唐景教流行中國碑

右碑題云景教流行中國碑頌并序大秦寺僧景淨述後云大唐建中二年歲在作噩太簇月七日大耀森文日建立朝議郎前行台州司士參軍呂秀巖書碑下及東西三面皆列彼國字式下有助檢校試太常卿賜紫

袈裟寺主僧業刹檢校建立碑石僧行通雜子字中字
皆左轉弗能譯也按碑三一妙身元元真主阿羅訶者
教之主也大秦國上德阿羅本者于貞觀九年至長安
也京兆府義寧坊建大秦寺度僧廿一人貞觀十有二
年也此卽天主教始入中國自唐至今其教徧天下矣
予讀西域傳拂菻古大秦國居西海上去京師四萬里
與扶南交趾五天竺相貿易開元盛時西戎昌萬里而
至者百餘國輒貢經典迎入內翻經殿遂使異方之教
行于中國然惟建寺可以度僧計當時寺五千三百五
十八僧七萬五千二十四尼五萬五百七十六凡兩京
度僧尼御史一人蒞之僧尼出踰宿者立案止民家不

過三宿九年不還者編諸籍甚嚴也今天下寺不常建而僧尼遂至無筭何耶

唐吉逾題雲居寺詩

右五言律詩五首七言絕句一首范陽縣丞吉逾序云
辛酉歲秋八月僕與節度都巡使王潛墨客軒輶偉僕
猶子駒駘播潛息益同躋攀于此勒四韻于後刻在山
頂石浮圖碑記之下人各爲書書左行行書字勢多斜
蓋因其空而刻之也碑立于開元二十八年庚辰詩後
有元和四年四月八日范惟清呂臣十三字則此詩序
所謂辛酉歲者乃建中二年後于庚辰四十有一年而
前于元和四年己丑二十有八年也

唐顏真卿送劉太冲序

右敘載魯公集行書筆筆作折釵股法爲顏書之冠接宣城戴綬跋云得劉太真墓碑于縣庖下同郡李兼經因出顏公送太冲真蹟遂刻石同置縣齋此碑蓋刻于慶元間趙氏已不及見狀真蹟猶藏于陝西東氏吾邑宋閔叔遇東孝廉于京師獲見之紙碧如玉墨黝于漆歷數百年如初落筆者亦闕劉太冲彭四字與刻本合沖弟太真史有傳登天寶上第文集三十卷神道碑文裴度撰蔣潼書史既不爲太冲立傳而太真傳又不及其兄微此碑沖幾裡沒無聞矣米元章書史云此序碧牋書王欽臣故物也華陰王宏撰云此序真蹟爲渭上

大宗伯南子與先生故物一孝廉借觀未遍而逸其姓
豈卽東孝廉也耶

唐顏魯公遺子帖

政可守不可不守吾去歲中書言事得罪又不能逆道
徇時爲千古罪人也雖貶居遠方終身不耻汝曹當須
謂吾之志不可不守也洪容齋云魯公忠義氣節史策
畧盡此帖是獨赴謫地而與其子孫者無由攷其歲月
千載之下讀之尙可畏而仰也按魯公子代宗時爲檢
校刑部尙書爲元載所惡坐論祭器不修爲誹謗貶陝
州而湖州放生池碑陰又云貶陝州旬餘再貶吉州靖
居寺題名云永泰二年真卿以罪佐吉州則此帖在大

歷二季蓋永泰二年之十一月卽改爲大歷元年也

唐顏真卿奉使題字

右魯公行書云真卿奉命來此事期未竟止緣忠勤無
有旋意狀中心恨恨始終不改游于波濤宜得斯報于
百年間察真卿心者見此一事知我是行亦足達于時
命耳又云人心無路見時事只天知按唐重跋云觀此
筆蹟不顯歲月以事實考之蓋使李希烈時也公奉使
陷賊庭者逾二年復無還期書此以自表云重旣摹公
之像于祠又訪得石本刻而寘之祠室靖康元年七月
書今同州有此碑上勒公小像未知原刻在何處

唐誌公畫像贊

右像吳道子畫李曰贊詞顏真卿書誌公卽寶誌此碑
燬于宣德中後靈谷寺僧本初以舊搨勒石去原本遠
矣石在揚州

唐吳嶽祠堂記

右記于公異譏冷朝陽晉爲李西平于興元元年十月
有事吳山而作也按晟傳德宗遣張少宏口詔進晟尚
書左僕射同中書門下平章事此記云鳳翔隴右涇原
四鎮北庭兼管內副元帥司徒中書令西平郡王而不
以僕射平章入銜豈敘後之官爵略前所加而不書耶
抑進至三公則解僕射平章耶唐制率以僕射平章遙
授藩鎮殆爲虛名晟拜鳳翔則爲節度以中書令出鎮

與僕射平章迥別矣舊書兼鳳翔尹新書遺四鎮北庭
皆當以碑爲正記又追述李抱玉鎮鳳翔日以中軍委
晟禱嶽雨降今晟亦鎮鳳翔復舉祠事文筆之工只三
四語盡西平偉績通鑑載公異草露布至梁州上覽之
感涕卽其人也朝陽書道媚可愛非俗手可及

唐咸宜公主碑

右碑鄜州節度使武元亨撰蘇州常熟縣令袁中孚書
集賢院學士李陽冰篆額公主元宗第十八女降秘書
監崔嵩而新史列在第二十二當以碑爲正史云貞順
皇后所生下嫁楊洄又嫁崔嵩碑爲之諱耶

唐顏真卿移蔡帖

右帖爲宋人忠義堂所刻云貞元元年正月五日真卿
自汝移蔡天也天之昭明其可誣乎有唐之德則不朽
耳十九日書按德宗紀真卿被害在貞元元年八月三
日舊書傳同而不言自汝移蔡新書有所以移蔡之故
而無月日觀此帖知真卿至蔡又逾半年忠貞之志至
死不改或謂顏公大臣當早自引決不宜被賊臣刀刃
之汚不知公奉命宣慰與守土異冀希烈悔禍一也或
事機可乘二也拘繫之所賊黨守伺三也想公下筆時
精光直冲霄漢故至今猶奕奕射人也

唐景昭大法師碑

右碑題云華陽三洞景昭大法師碑并序朝議大夫檢

校國子司業兼御史中丞吳縣開國男陸長源撰朝議大夫檢校尚書兵部郎中兼侍御史上柱國竇泉書并篆額貞元三年四月口日建碑云紫陽真人字懷宣丹楊延陵人按西漢丹陽郡則治宛陵丹陽縣則今之建康也東漢史皆作丹陽如費鳳巖訴碑亦然惟丹楊太守郭旻碑作楊西晉移都建業元帝改太守爲丹陽尹而宋板晉書則丹陽郡爲陽丹楊縣爲楊註云山多赤柳故名丹楊如顏平原乞恩表祭姪文皆云丹陽縣侯也唐天寶中以京口爲丹陽郡改曲阿爲丹陽縣皆非漢舊壤他書所載此郡字無從考者而此碑郡名亦作楊似郡縣俱宜作楊後人傳寫之誤卽縣亦作陽矣法

師姓韋氏蓋茅山三洞之間道者書極壯偉不在元靜
碑之下

唐幽州新置文宣王廟碑

右碑題云幽州盧龍節度觀察等使工部尙書御史大夫幽州大都督同入使劉公新置文宣王廟碑新置云者天下郡縣皆有文宣王廟范陽獨無而劉公創建之也碑不著其名字按史劉濟父子爲盧龍節度憲卒于貞元三年又二年而碑始建碑云建中初公宰是邑特興斯廟又云時公年始弱冠與濟傳合濟以貞元五年充幽州節度卽以是年立碑追頌其牧宰時事也夫子之教能使蠻貊盜賊感而爲善故唐之藩鎮擅自繼襲

者皆驕蹇不奉法濟特恭順朝獻相繼殆本崇奉先師之一念而後能遵王度守臣節歟

唐賀蘭夫人墓誌

右賀蘭夫人墓誌題曰秘書監陸公夫人墓誌銘姪曾孫贊撰或曰贊書也秘書名齊望贊之曾從祖也按爾雅女子謂兄弟之子曰姪喪服傳曰謂吾姑者吾謂之姪賈公彥疏曰姪者對姑之稱故春秋傳曰姪其從姑以兄弟之丈夫子曰姪者非也顏之推家訓曰兄弟之子北土多呼爲姪自晉以後始呼叔姪古人稱兄弟之子皆曰子朱子語類自曾祖而下三代當稱從子此云姪曾孫者亦俗稱也

金石錄補卷十八

卷尾

崑山葉奕苞九來著

唐僧懷素聖母帖

唐張氏墓誌

唐李說進甘露表

唐李公墓誌

唐懷素千字文

唐音光明殿

唐新府君墓誌銘

唐鑄鼎原銘碑陰

唐劍州長史李公神道碑

唐許夫人祈氏墓誌

唐時侯墓誌銘

唐懷素藏真帖

唐懷素聖母帖

右聖母帖素書于貞元九年五月而左拾遺裴休試大理評事柳乘鄉貢進士柳槃大和四年十月十二日同登則觀此帖署名也董尚書謂孫過庭草書難讀如食多骨魚得不償失因爲注釋予于此帖亦云

唐張氏墓誌

右碑序云氏年二八適于范氏春秋五十九卒以貞元
十一年葬于州北皋陶村据長洲徐淳孝云蘇之葑門

外皋陶邨耕者得古銅瓶二古鏡一古藝器數十皆應
手碎忽得此志其文字古簡因攜以貽好事

唐李說進甘露表

右表在石壁寺甘露義壇碑陰表云臣說言臣所部太原府交城縣石壁山寺今月二十二日夜甘露降於寺內戒壇西及寺外柏林上大枝小葉無不周徧凝泣垂滴甘甜如蜜當寺臨壇大德僧慎微與僧惠廣等十五人咸共觀嘗覆問如狀云云貞元十二年九月二十五日按臣說者河東節度使北都留守太原尹李說也甘露碑立于元和中而此表勒于碑後蓋追溯其事而存之也歟

唐李公墓誌

右碑題云唐故寧遠將軍守左金吾衛大將軍隴西李公墓誌銘并序從姪鄉貢進士藝通撰貞元十三年夏五月十一日建序云公諱宗卿字同系錄中有段行琛碑乃李同系篆額豈宗卿常以字行耶抑偶同也耶

唐懷素千字文

右素書千字文名于金帖以一字直一金也後題云貞元十五年六月十七日子零陵書時年六十有三正其晚年之作脫去狂怪漸趨平淡趙子函以爲促而無韻者謬也

唐普光明殿碑

右碑題云尚書李公造華嚴三會普光明殿功德碑太
常寺協律郎支喬字好古撰書貞元十六年四月十日
建尚書者李說也說在鎮六年遇疾不能錄軍府之政
故爲此增造佛宇以邀福祐卽以是年十月卒碑中頌
天人任氏極其揚厲有如月之亘森菌桂以馨香如山
之容寘大椿之壽筭顧寧人云蓋用詩如月之恒恒音
古鄧反作直按詩傳恒強也陸德明釋文恒本亦作緼
同古鄧反沈音古桓反考工記弓人恒角而短鄭司農
云恒讀爲袞緼之緼是緼恒直同爲一字陸氏讀爲去
聲而此碑用之耳碑在交城縣西北萬卦山天寧寺唐
時以太原爲北都交城去府八十里說傳以北都副署

守代李自良而爲河東節度使檢校禮部尙書碑則云
河東 節度觀察支度營田等處置使北都留守銀青
光祿大夫檢校禮部尙書兼御史大夫太原尹隴西郡
開國下闕八字可以補傳之漏行書追踪二王亦藝苑之傑
出者

唐靳府君墓誌銘

右碑題云大唐故靳府君墓誌銘朝議郎試少府監丞
張遇撰并書府君諱英希字英希族靳氏西河人也楚
有大夫靳尚卽其後矣以貞元十六年七月十八日卒
卽以十七年二月四日與夫人魯氏合葬今少宰孫退
谷先生名承澤號北海跋云此誌近出澇縣錠子郝字

彷彿亭法其石在予硯山齋中聞近日秦豫之間新出
賈闐僊志尤佳惜未之見也

唐鑄鼎原銘碑陰

右鑄鼎原銘金石錄載王顏撰袁滔篆書而此則韋諷
于貞元十七年識其碑陰也有云得玉珮于原上地深
四尺黃帝去今六千四百三十年此上升時小臣遺墜
物者其說怪甚司馬遷曰余讀諺記黃帝以來皆有季
數然稽其歷譜五德之傳古文或乖異靡同夫子之弗
論次豈虛哉予觀邵堯夫經世一書卒代世數斷自堯
始而此云黃帝至唐貞元中爲六千四百三十季者漢
季緯書也緯書出于臆說可盡信乎

唐劍州長史李公神道碑

右碑題云唐故劍州長史贈太僕少卿汝州刺史隴西
李公神道碑銘并序書撰人姓名殘缺貞元廿年甲申
十一月壬申十三日建按公諱廣業字次泐我景皇帝
爲公之五代祖曾祖淮安王神道祖淄川王孝同烈考
雲麾將軍璲子國貞爲王振所害以國貞子鎧貴始樹
此碑又五年而鎔板據孝同碑云子琪此云璲豈孝同
有二子耶抑璲有二名耶國貞原名若幽與弟若水新
唐書附見李復傳然不云若水爲國貞嫡弟且遺國貞
原名其闕略處不及舊史遠甚王弇州謂書撰人竟不
可攷而碑中有雲遠常學舊史之語撰文應是鄭雲達

達與錫同時以禮部侍郎爲李辰軍司馬而碑之署撰
處隱隱有侍郎字信爲雲達也陝西趙子函石墨鐫華
及馮孝廉文錫皆云相傳爲徐浩書觀其筆致頗似會
稽而無渴驥怒猊態已而發先世廢簏得此碑楷墨工
好波磔未泐署撰處確然爲雲達撰并書等字後一行
則袁滋篆額也近搨殘闕過半不可句讀較之此碑殆
如胥壤先文莊碑甚富此爲其一王尚書去先公時未
百年而碑已難辨況今日乎

唐許夫人祈氏墓誌

右碑題云唐故許氏夫人祈氏墓誌銘并序鄉貢明經
李師聖述序云夫人字芳太原人也先伊耆氏之胄遠

祖居毗陵今爲毗陵人祖觀父昇子仲宣仲康而不及
其夫子之名何也以貞元二十二年安厝于震澤里說
文厝厲石也引毛詩佗山之石可以爲厝今詩作錯而
孝經借七互韻爲措江左用沈韻乃不從藥而從遇何
也祈姓太原徵音堯伊耆氏之後歐陽公祈衛尉墓碑
云黃帝之裔豈溯堯之所自出也耶

唐時僕墓誌銘

右碑題云唐故鉅鹿時公墓誌銘并序鄉賦進士劉通
明述序云公諱僕字鑑其先鉅鹿人家子武清壽不永
年以貞元二十一年卒一子未勝喪禮妻鄭氏弟良鍔
葬公云云此碑在薊縣海王邨岸圮而出唐制取土之

科由州縣者曰鄉貢升于有司此曰鄉賦豈卽貢之之意耶唐書裴休從鄉賦登第能爲諤詩鄉賦之年諷誦多在人口當時固有是語也

唐懷素藏真帖

右藏真帖云恨不與張長史相識逢顏尚書自云頗傳長史筆法然後知平原亦宗顥旭如爭座位祭伯祭姪文行草皆極自然也此帖似張伯英以一筆書行斷則再連續真有霆不暇擊電不及飛之妙

金石錄補卷十九

跋尾

崑山葉奕苞九來著

唐懷素律公帖

唐鄆都宮陰真人詩

唐胡證題少室詩

唐燭柯山石橋記

唐修諸葛武侯祠碑

唐太原王公墓誌銘

唐范希朝恒獄題名

唐麟臺碑

唐建周孝侯府君碑

唐馬氏墓誌銘

唐內侍李輔光墓誌

唐中天王廟碑

唐羅池石刻

唐季氏都夫人墓誌

唐承天軍裴度題名

唐邠國公功德銘

唐李紳端州石室題名

唐左僕射李光進碑

唐峽石寺遠法師碑

唐卜府君墓碑

唐李諒跋胡證少室詩

唐春城院建華嚴道場碑

唐懷素律公帖

右素貽律公者卽今之尺牘也歐公以懷素之徒棄百
事而學書爲可笑米海嶽云智永硯成臼乃到右軍若
穿透始到鍾索則歐公之言似非篤論此帖作游絲筆
法若懸崖墜石驚電過光觀止矣

唐鄆都宮陰真人詩

右陰真人詩唐貞元中刺史李貽孫書按真人名長生
新野陰氏其學類左元放嘗授太清神丹世傳丹經營
文甚古雅葛洪曰長生服金液半齊止世閒幾千年然

後仙去宋元豐四年轉運判官許安世于祠下盡閱石
刻謂此三詩乃陰氏作餘皆後人托之屬知夔州吳師
孟書送觀中子是盡毀諸石惟此本爲貽孫原刻也

唐胡證題少室詩

右唐檢校祠部員外郎胡證汝州北樓晚望少室詩詩
云峭拔烟雲外雄居造化工三山慙海上五嶽讓天中
積翠當華甸騰標占太空周臨萬里暮猶掛夕陽紅永
貞元年仲夏記按新舊書證傳皆云貞元中登第蘇潤
城舉爲從事自殿中侍御史爲韶州刺史而已據此碑
先爲祠部員外郎可以補史之闕漏

唐燭柯山石橋記

右記衡州刺史陸度撰言簡氣舒多物外之致王象之
輿地碑記最爲廣備此獨見遺

唐脩諸葛武侯祠碑

右碑題云蜀丞相諸葛武侯祠堂碑節度掌書記侍御
史內供奉賜绯魚袋裴度諱營田副使檢校尚書吏部
郎中兼成都少尹侍御史賜紫金魚袋柳公綽書元和
四年己丑二月廿九日建碑云或秉事君之節無開國
之才得立身之道無治人之術兼而行之則諸葛公其
人也陳壽崔浩之徒皆以變詐論節制之師以進取語
化成之治謬甚余思考亭朱子猶自武侯爲笨況其它
乎唐史武元衡帥西川表度掌書記碑中所稱相國歸

淮公者元衡也公綽亦爲節度判官故與晉公相得尤甚唐人去晉未遠書法皆本二王但離去臨仿之蹟便自成家米海嶽云柳與歐爲醜怪惡札祖公綽乃不俗于兄觀此碑固是書中俊鵠名不虛得洵狀

唐太原王公墓誌銘

右碑題云唐故江南西道觀察判官監察御史襄行太原王公墓誌銘并序表姪前諸道轉推官將仕郎試大理評事許志雍譔猶子鄉貢進士楚卿書序云公諱雅字元宏太原祁人也少季爲秘書郎嚴維所知又爲禮部侍郎劉太真舉登甲科爲山南東道嗣曹王舉從事調補左衛率府兵曹叅軍爲嶺南連帥韋公丹表遷左

金吾兵曹參軍韋公節制東川奏遷廷尉評兼監察御
史府韋公再遷慈晉俄領江西復隨鎮拜監察御史裏
行以南康缺牧假行刺史事盡間里之情祛疲蒞之疾
元和四年正月終于洪州南昌之官舍以其年十月歸
窆京兆且有以公之德可以反澆漓以公之仁可以厚
風俗等語蓋韋丹治行當時所稱丹之所舉必屬循吏
碑文非諛詞矣丹傳河南少尹未至徙義成軍司馬以
諫議大夫召授劍南東川節度使代李康召還拜晉慈
隰州觀察使江南鹵道觀察使碑云丹爲嶺南連帥可
以補史之闕

唐范希朝恒嶽題名

右題名云河東節度支度營田觀察處置等使開府儀同三司檢校司空太原尹御史大夫北都留守上柱國成紀郡王范希朝奉詔領馬步五萬人與義武合軍赴恒州討叛得薦誠于安天王開二領叅佐三人大將一百一十五人故拜壇下用祿靈贊遂于縣城南屯軍開二字而還元和五年二月六日鐫乃行書之逸品按希朝爲當時名將比之趙充國封成紀郡王而新舊唐書皆不載新書謚忠武改宣武而舊書遺之非此題名則希朝之封爵幾湮沒矣中宗封兄千里亦爲成紀郡王

唐麟臺碑

右碑文韋表微撰元和五年十一月表徵以滑之從事

使于鄖陽停驂訪古得獲麟之舊壤後人築臺于此云
云其文感先聖之不遇悼麟出之非時大約附會先儒
以麟爲仲尼而至善乎正義之言曰防風之骨肅慎之
矢季氏之犧羊楚王之萍實皆問仲尼而後知豈爲仲
尼而至乎按左傳西狩于大埜注在鉅野縣大澤此碑
云鄖陽訪古得之唐之鉅野爲麟州廢隸鄆州後復置
鉅埜今因之

唐建周孝侯府君碑

右碑首曰晉故散騎常侍新平廣漢二郡太守尋除楚
內史御史中丞使持節大都督塗中京下諸軍事平西
將軍孝侯周府君之碑晉平原內史陸機撰文右軍將

軍王羲之書唐元和六年歲次辛卯十一月廿六日承
奉郎義興縣令陳從諫重樹前試太常寺協律郎黃應
書平原華明素篆額琅玕丞仕榮鑄勾當造廟廿一代
孫故湖州司士息瑰副元恒宗錄同晁宗典士琳惟良
與諸宗子同構造云云子于庚子之春過宜興謁孝侯
廟下訪是碑于徐太守映薇以此本相贈乃舊搨本剝
落無幾中有元康九年周疾加增奄捐館舍春秋六十
有二天子臨墓至建武元年冬十一月追贈平西將軍
雖詳述弦絕矢盡力戰不退並無致危授命之言所弗
解也平原在建武初已及成都王穎之難卽右軍與平
原亦不同時其僞可知也顧炎武曰此碑本唐人之書

故業字晉諱而直書之其子唐諱則世虎基豫等字皆
與畫或改用它字至塗中之名亦有可疑晉書王凌詐
言吳人塞塗水琅琊王佃出塗中桓溫自山陽及會稽
王昱會于塗中謝石率舟師屯塗中譙王尙之衆潰逃
子塗中並作塗唐人加乃爲滁卽今之滁州也而碑作
塗非是按文選任昉彊曹景宗東闢無一戰之勞塗中
罕千金之費李善本作塗中通鑑嘉平二年吳王遣軍
作堂邑塗塘辯誤云塗塘卽塗水今滁州之滁河也塗
之作塗蓋已久矣顧氏非之何耶

唐馬氏墓誌銘

右碑題云大唐扶風馬氏墓誌銘并序無書撰姓名序

云廿三娘郎郎姹姹扶風人也故侍中太原尹子曾王
父故太子諭德兼兵部郎中子大王父故鄂州州從事
子之先父也子生子珥貂之家育在紵綺之室笄年廿
歲灼如舜英何華而不實祉福不臨以元和八年七月
三日洪水蜀來浸溢夏汭合郭爲患假官航以度墊溺
豈巨舟云覆相次淪沒以八月四日窆于先父塋側云
云初疑郎郎姹姹非廿三娘字諱又稱之爲子及讀銘
文云伏波有女青娥豔陽馬氏有男白眉最長豈春華
之焜景同淪沒于舟航始知大水驟至歿者非一故概
呼之爲子歟郎郎爲男姹姹爲女姹訓少女也又美也
唐人多以姪名其女者適閱唐陳直誌女孫一人姪娘

春姬是也憲宗紀八年六月辛卯渭水溢溫公通鑑亦
云夏六月大水上以爲陰盈之象出宮人二百車碑云
七月未知孰誤

唐內侍李輔光墓誌

右誌題云唐故興元元從正議大夫行內侍省内侍知
省事上柱國賜紫金魚袋贈特進左武衛大將軍李公
墓誌銘并序朝議郎行尚書刑部員外郎崔元略撰宣
德郎前晉州司法叅軍巨雅書按序諱輔光字君肅其
祖父皆仕族而爲內侍何也碑內官掖作官踐祚作祚
士君子作仕皆誤顧寧人曰碑文云門吏晉州司法參
軍乞雅此輔光爲河中監軍所除唐時士人出于內侍

之門者蓋不少矣輔光少選入內而有夫人輔氏子四人唐之宦官有權位者則得娶婦史載高力士娶呂元晤女李輔國娶元擢女皆奉敕爲之而楊復光至假子數十人後漢劉瑜傳言常侍黃門亦廣妻妾周舉傳言豎宦之人亦復虛以形勢威侮良家取女閉之至于白首歿無配偶單超傳言四侯轉橫多取良人美女以爲姬妾則固不始于唐時也

唐中天王廟碑

右碑題云新修嵩嶽中天王廟碑河南縣尉韋行儉撰河南縣尉攝登封縣今揚修書元和十二年二月八日建按唐紀事之盛莫如中西二嶽蓋華近長安而嵩在

東都境內也中天王之秩封自天寶碑中所序天王洎夫人纓綵冕服首飾步搖皆閒以金翠章用五色而施子啟母少娘之倫又有操大屈注僕姑執殳秉鉞環列廡下者首如鎖目如瞋臂如戟吻如相稽之類其文怪險歷落一洗俳偶之習修雖無書名而波磔督策之間殊有逸氣

唐羅池石刻

右石刻云龍城柳神所守驅厲鬼出匕首福四民制九醜元和十二年月日柳宗元書按韓昌黎柳州羅池廟碑序宗元與其部將魏忠謝寧歐陽翼飲酒驛亭謂之曰明年吾將死死而爲神後三年爲廟祀我及期

而死三季夢翼而告曰館我於羅池云云子厚於羅池
流連不忍去也如此觀此石刻行書放縱詞氣壯厲其
生前固有沒而爲神之意宋陳思書小史引臨池訣云
宗元與劉禹錫得筆法于皇甫閔以柳爲入室劉爲及
門宗元頗自矜其書狀亦不甚工此刻漸入狂怪似非
工于書者

唐季氏都夫人墓誌銘

右碑今在常熟縣梅里鎮王古樵家按序以都氏之女
而歸于季長慶元年十一月葬于常熟之珍門鄉在縣
東五里蓋墓中石也未知何時始見于世石君兄得揚
本載楊五川跋乃嘉靖乙巳歲云

唐承天軍裴度題名

右碑云有唐長慶元年秋七月趙人亂其帥宏正爲下所弑我公奉詔率諸侯之師問罪冬十月師次于承天軍十有二月入貴泉缺天子下哀痛之詔缺庭湊爲師以息人也是月班師晉陽公命掌書記元輿錄其名爵洎叅佐將校凡五十九人刻于承天軍城西石壁公有舅有弟自他府來有二子從行咸附列于後廿一日癸未舒元輿題鎮州四面行營都招討河東節度觀察處寘押北山諸蕃等使太原尹北都留守司空兼門下侍郎平章事晉國公裴度其五十九人皆平列而元輿在屬吏第六弟名庾子名詡譏按傳記此事在穆宗卽位

之下有王庭湊名而未嘗顯言田宏正被殺因其加度
鎮州招討兼押北山諸蕃使與題合故悞及之傳殊不
詳也子識諗各有傳附後而非訛譏度蓋五子云唐宰
相勳名赫著令終如度者絕少覩此題名能不起敬

唐邠國公功德銘

右邠國公碑護軍中尉宏農郡開國侯楊承和撰并書
朝議郎權撫州長史陸邵篆額長慶二年十二月一日
建邠國公者內侍梁守謙也此碑以守謙造經於興唐
寺而立且謂淮蔡之功十居其七當時詔諛遂至于此
碑在西安府學今已剗去承和姓氏豈以惡其佞而刻
之者耶

唐李紳端州石室題名

右題名云李紳長慶四年二月自戶部侍郎貶官至此
寶歷元年二月十四日將家累遊按先公跋云此刻至
今成化壬午六百三十八年兩廣有唐人名蹟亦僅見
云

唐左僕射李光進碑

左碑題云大唐故朔方靈鹽等軍州節度副大使知節
度事管內支度營田觀察處置押蕃落等使銀青光祿
大夫檢校刑部尚書兼靈州下缺都督府長下缺史大夫安
定郡下缺尚書左僕射李公神道碑并序門下侍郎中書
門下平章事令狐楚撰嗣子季元書按碑云安定郡王

諱光進字耀卿年五十七其先阿跌氏出於南單于十二姓貞觀初祖賀內屬父良臣爲雞田州刺史光進以隴西公說榮陽公儕大司空嚴公綬大司徒范公希朝薦云云新唐書有名無字年六十五加封安定郡王及其祖父皆在所遺表薦者王承宗與范希朝而已檢校工部尚書與碑題刑部尚書異皆當以碑爲正至兼御史爲代州刺史及光顏先娶母死光顏婦藉貲財貯納管鑰光進泣而反之碑亦遺焉子季元燧元毅元綬元吉元夫人史氏以乙未六月薨越十一年墓而無紀元傳云元和四年表薦爲都將俄振武節度遷靈武當薨在元和十年葬在寶歷元年也唐有兩李光進一爲光

弼之弟此則光顏之兄也

唐峽石寺遠法師碑

右碑題云大隨峽石寺遠公遺蹟後云寶歷元季四月
沙門紫羽請刻石臺上河東薛重元刊錄故志薛唐夫
書按遠公亦名慧遠爲燉煌李氏之族歿于開皇十二
季在京淨影寺是日輒朝高祖曰喪我國寶矣遠公修
涅槃義疏絕筆後人名爲絕筆臺臺在峽石寺中

唐卜將軍墓碑

右碑在吾邑馬鞍山南北山下掘地得碑方知爲墓其
略曰府君姓卜名珍字文超西河人敬宗時藩鎮騷然
將軍奮孤忠爲世所重寶歷元年葬于崑山西鹿城銘

曰森森孤柏宛轉龍岡孤雲垂蓋日月懸光千秋萬古
嗚呼夜長云云前後磨泐無書撰人姓名嘉靖末年倭
寇攻城若有神兵出于卜山助戰冠平表而祠之

唐李諒跋胡證詩

右汝州刺史李諒跋胡證少室詩云寶歷二年冬八公自
戶部尙書判度支推轂受脤出鎮交廣麾旌過汝言訪
舊題諒易公所濡翰之板琢于石而志之按證傳寶歷
初以戶部尙書判度支證固辭讓拜嶺南節度使觀此
跋自戶部尙書判度支則未嘗辭也史家之言可盡信
乎

唐春城院建華嚴道場碑

右華嚴道場碑書撰姓名俱已殘闕後云太和元季丁未九月庚申朔癸亥建碑題春城春字上闕三字其中敘述南陽張公分鄒魯之銕及寺在山陽邑東可三四里云云按漢山陽郡在昌邑縣在河內晉山陽府今淮安唐之山陽在楚州今之山陽縣也唐人佞佛每借佛事以頌揚守牧之德政其書撰人必極工故所傳最久後之人無所托而止工諂謾書誤有所不擇宜去思亭內諸碑昔立而今亡也

金石錄補卷十九